

## Adelaide und Kangaroo Island

Am 10. 2. 07, bin i nach Adelaide mit em Nachtbus. Dert han ich denn zerscht emal 6 Stund müesse warte, bis i mis Zimmer han chöne bezieh. Bi aber so müed gsii, dass i eifach chli pfuused han. Am Nammitag bin i dur d'Shopping Feussgängerzone vo Adelaide gloffe und ha no s'esse postet für am nächschte Tag, wenn s'mami und dä Papi aachömed! Am Abig han i no zwei lässigi Solothurnerinne kenneglernt und durs gspräch han i mini nervosität chli vergässe! Am 7i am Morge, bin i denn wartend z'Adelaide am Flughafä gstande und saunervös gsi. Fascht ei Stund später sinds denn endli cho! Isch so schön gsi sie wieder emal chöne in Arm näh! Nach mä mega z'Morge, sind mir no chi id d'Stadt, aber dä Papi isch immer wieder iignickt, und so sind mir z'rugg is Back Packers und händ es namittagschläfli gmacht! ☺ Ja, diä Ziierverschiebig gaht halt nid eifacht a eim verbii! Nach mä feine Indische z'Nacht (eigentlich händ mir wela Australisch esse) sind mir scho glii is Bett! Am nächschte Tag sind mir mit Sack und Pack nach Glenelg, wo mir s'Auto abholt händ. En Toyota Campervan! Nach ärä Übernachtig in Glenelg ( min Rugge hät mir scho nach dä erschte Nacht , uf däm unbequeme Bett, weh tah) sind mir mit dä Fähre für 4 Tag nach Kangaroo Island!

Dert händ mir d'Insle mit em Auto unsicher gmacht. Am 1. Tag, sind mir nach Kingscote und händ eus det mal schlaue gmacht, was mir wänd i dene 4 tag gseh! Am Abig händ mir aber z'erscht glueget wies Pelikane g'füeteret händ! Mensch, händ die es grosses Muul, nos grössere als ich und s'Mami zäme, und das bedüütet öpis! Nacheme feine z'Nacht, händ mir eigentli wellä go Pinguine aaluege aber die gönd 1mal im Jahr, für drei Wuche is Meer use und das händ's geau 5 Tag vorher gmacht! Sniff ☺! Bi scho sehr truurig gsii, will pinguine het i uh gern gseh! Am 2. Tag isch's mit underbrüch, für Koalas direkt am Strasserand, zu mä Lüchturm und is Visiter Center chli go käfele! Dä ganz Tag händ mir uusschau nach Kangaroos ghalte , aber keis einzigs gseh und chum ufem Campingplatz hät's gad mehreri gha! Während dem s'Mami und dä Papi s'Fleisch brätlet händ, bin i bim Auto gsii, und bi belageret worde vom e ganz ufdringliche Kängi! Ganz en freche, er wär sogar is Auto ine, wenn i d' Autotür nid zue tue hett. Er isch denn au blibe, und wo mir händ wellä esse, händ mir müesse is Auto zügge. ☺ au am Morge, sind d'Kängis wieder dah gsii und wo dä Papi mitem Auto hät wellä usefahre, hät dä chli kein wank gmacht.! Mit chli nachhelfe isch es denn aber doch gange.

Am 3. Tag sind mir z'erscht zum Admirals Arch, so enart offni Höhli und dert häts ganz viel Neuseeländischi Seelöwe gha! Grossi und chlini, verschlafni und plantschendi, eifacht alles und uu viel.! ☺ Am Namittag no zur little Sahara, e mega Sanddüne und die einte Chind sind so lang abetroolet, dass'es ihne schlecht worde isch! Am letschte Tag sind mir no zu dä Seal Bay und dert händ mir denn ganz näch abe zu dä Australische Seeleue chöne. Isch echt läss gsii, Kangaroo Island! Mängmal eifacht e chli en chalte Wind!!Brrrrrrrr!